

REKONSTRUKCIJA ZGRADE NARODNE BIBLIOTEKE MOSTAR U MOSTARSKOM NASELJU LUKA



RECONSTRUCTION OF THE PEOPLE'S LIBRARY MOSTAR IN LUKA SETTLEMENT

**Rasim Prguda, Narodna biblioteka
Mostar**

Sažetak

Završetkom građevinskih i zanatskih radova na objektu nije u potpunosti završen

projekat rekonstrukcije i revitalizacije Narodne biblioteke Mostar, jer preostaje rad na posljednjoj fazi koja uključuje nabavku namještaja, informatičke opreme te najopsežniji posao - prikupljanje knjižnog fonda za ovu biblioteku.

Ključne riječi: Narodna biblioteka Mostar, rekonstrukcija, revitalizacija

Summary:

Completion of the constructional work of the building, and a project of reconstruction and revitalization of the People's Library Mostar had not been completely finished. Still, the last phase of work has to be done which includes purchasing of furniture, computer equipment, and the most comprehensive work collection of book stock for this library.

Keywords: People's Library Mostar, reconstruction, revitalization

U vremenu kada se sve manje i manje ulaže u rekonstrukciju ratom porušenih

objekata, te kada se vrlo malo sredstava izdvaja za kulturne institucije, zahvaljujući finansijskim sredstvima koje je osigurala Fondacija za održivi razvoj „Odras“, putem projekta: «Obnova biblioteka BiH» i Grad Mostar je kao lokalna sredina dobio vrijedan objekat Gradske biblioteke u mostarskom naselju Luka.

Projekat: «Obnova biblioteka u BiH» rezultat je brojnih

zahtjeva lokalnih zajednica koje su prihvatile inicijativu Nacionalne i univerzitetske biblioteke BiH pod nazivom:

«100 Javnih biblioteka u BiH 2003-2012» kojom se BiH pridružuje «Dekadi pismenosti UN-a, 2003-2012». Fondacija za održivi razvoj «Odras» uz značajno finansijsko učešće Grada Mostara prihvatila je našu projektnu dokumentaciju i tako smo uključeni u projekat za obnovu 40 biblioteka u Federaciji BiH. Prihvaćen je projekat građevinskih i zanatskih radova u cilju popravke, rekonstrukcije i adaptacije naše totalno uništene zgrade biblioteke u naselju Luka.

Zgrada Narodne biblioteke na Luci sanirana je tako da će biti jedna od najmodernijih objekata slične namjene na području Hercegovine, jer arhitektonske karakteristike objekta ukazuju na uticaj Evropske arhitekture s početka XX stoljeća. Korišteni materijali i tehnologija izgradnje govore o vještim i stručnim arhitektima i izvođačima radova.

Tokom zadnjeg rata 1992. 1995. godina zgrada je pretrpjela velika oštećenja, te je za sanaciju trebalo izdvojiti značajna sredstva koja dostižu 300.000 km. Značajno je napomenuti i to da se pomenuta zgrada nalazi u blizini same stare jezgre grada Mostara i Starog mosta.

Obnovom ovog za Mostar značajnog objekta najviše koristi imat će učenici, studenti i svi građani sa čitavog prostora Grada Mostara i šire. Ubrzo očekujemo dolazak predstavnika Svjetske banke, Fondacije «Odras» i grada Mostara, koji bi na prigodnoj svečanosti trebalo da označe završetak građevinskih radova na ovom objektu.

Međutim, ovdje se ne završava projekt rekonstrukcije i revitalizacije objekta na Luci, jer onda preostaje rad na realizaciji posljednje faze projekta koja uključuje nabavku inventara, namjenskog bibliotečkog namještaja,

informatičke opreme, te najopsežniji posao prikupljanja uništenog knjižnog fonda .

Otvaranjem i puštanjem u funkciju ovog divnog objekta od oko 500 metara kvadratnih, naši korisnici bi dobili nove i u svakom slučaju kvalitetnije sadržaje.

Prema namjeni i projektu predviđen je sljedeći prostor :

Zajedničke prostorije za sve čitaoce biblioteke, bez obzira u kojem će odjeljenju čitalac nadalje raditi

Prostorije za čitaoce koji posuđuju knjige van zgrade

Prostorije- čitaonica za korisnike kojima je potreban knjižni fond koji se koristi samo u prostorijama biblioteke i magazini za ovaj dio knjižnog fonda

Prostorije za internet klub

Prostorije za « Klub čitalaca » sa bifeom i prostorom za kulturno druženje

Prostorije za izložbe knjiga, promocije knjiga, razne druge izložbe, sala za stručna predavanja sa svim potrebnim audio-vizuelnim sredstvima i slično

Prostorije za stručnu obradu knjižnog fonda, za osoblje biblioteke kao i kancelarijski prostor za upravu biblioteke .

Kompletnim opremanjem saniranog objekta stekli bi se uslovi rasterećenja sadašnjeg prostora u kojem radimo i djelujemo u neadekvatnim uslovima .

Može se očekivati i povezivanje u jedinstveni bibliotečki sistem COBISS-BiH , čije je sjedište u NUB-i BiH u Sarajevu. Od našeg osnivača i finansijera očekujemo odobrenje sredstava za prijem novih i stručnih kadrova , što do sada nismo bili u mogućnosti .

Naši planovi su permanentna edukacija bibliotekara u saradnji sa NUB BiH, sa kojom imamo dosta dobre i uspješne odnose.

